

Communicaziun a las medias BCG

La BCG sustegna la restauraziun da la fatschada sid da la baselgia claustrala da Mustér

Cuira, ils 5 da december 2016 – L'emprima etapa da la restauraziun da la baselgia claustrala da s. Martin da la claustra da Mustér è bunamain terminada. E quai gia dus onns suenten las emprimas activitads da fundraising intensivass per la finanziaziun da la restauraziun. Quai è stà pussaivel grazia a la donaziun generusa da la Banca Chantunala Grischuna (BCG). La BCG sco emprima donatura ha empermess CHF 0,5 miu. l'atun 2014 ed ha uschia fatg via a las ulteriuras empermischuns che han pussibilità la restauraziun da la fatschada sid da la baselgia claustrala. L'element central è stada la restauraziun dal fresco dal mantè da protecciun che caracterisescha dapi passa 300 onns la fatschada sid da la baselgia claustrala.

Gia l'onn 2007 han ins fatg ils emprims studis preliminars davart la restauraziun necessaria da la baselgia claustrala da s. Martin. „Ma alura è vegnì il moratori da la Confederaziun che ha sclaus il sustegn finanziel per edifizis. Per consequenza avain nus stuì interrumper il project, la finanziaziun na fiss betg stada pussaivla“, raquinta l'avat Vigeli Monn dals plans da restauraziun da la claustra.

L'onn 2014 – l'onn dal giubileum da 1400 onns claustra da Mustér – è il project da restauraziun daventà ina mesira d'urgenza. Parts da la liadira crudavan giu da la fatschada sid – ins ha stuì metter si ina puntanada da segirezza per proteger ils paders ed ils visitaders. „Igl è stà cler, ussa stuain nus prender per mauns la restauraziun, uschiglio datti donns irreparabels“, descriva l'avat Vigeli Monn il punct da partenza da l'act da forza finanziel da rabagliar ensemen CHF 15,0 miu. per la restauraziun.

Sin fundament d'in plan da basa per la claustra da Mustér han cumenzà las stentas da fundraising sut la direcziun dal delegà da la fundaziun Pro claustra da Mustér, Arnold Kappler. Cun agid d'in comité da patronadi represchentativ ed il grond sustegn da la Tgira da monuments dal chantun Grischun èsi reussì da segirar en mo dus onns CHF 11,8 miu. per finanzia la restauraziun.

Sco emprima donatura han ins pudì gudagnar la Banca Chantunala Grischuna che ha concedì l'atun 2014 la contribuziun da 0,5 miu. CHF. „Nus sustegnain la restauraziun da la baselgia claustrala da s. Martin perquai ch'ella è in dals bains culturals ils pli custaivels dal Chantun“, di Alois Vinzens, CEO da la BCG. Cun questa empermischun ha la finanziaziun cumenzà a marschar – ulteriuras empermischuns èn suandadas.

Che la restauraziun da la fatschada sid da la baselgia claustrala è ussa gia quasi terminada, po la claustra engraziar al sustegn da la Tgira da monuments dal chantun Grischun sut la direcziun da Simon Berger sco er al cusseglier guvernativ responsabel Martin Jäger. Cunquei che las autoritads han classificatg la restauraziun da la fatschada sid sco mesira d'urgenza, ha il Chantun cusseglià da far las lavurs in onn pli baud. Il Chantun e la Confederaziun han contribuì ina summa communabla da 0,8 CHF al project „fatschada sid“ che ha custà en tut CHF 3,2 miu.

La primavaira 2016 han cumenzà las lavurs vi da la fatschada sid da la baselgia claustrala cun l'amplificaziun da la puntanada da segirezza. Las lavurs èn sa concentradas per l'ina sin la restauraziun da la liadira e per l'autra sin la restauraziun e reconstrucziun parziala dals frescos.

Il maletg dal mantè da protecziun sin la culmaina da la baselgia barocca da s. Martin da la claustra da Mustér mussa dalunsch ch'il convent benedictin dastga sperar sin la protecziun speziala da Maria. Quest fresco da la Nossadunna che caracterisescha la fatschada da la baselgia claustrala da s. Martin ha fatg ils pli blers quitads a l'architect Matthias Schmid ed a la restauratura responsabla Sylvia Fontana. Lieus chavortgs davos il maletg avevan per part statgà il fresco da la fatschada, singulas parts da la pictura n'eran strusch pli visiblas.

Ch'ins po oz suenter 300 onns danovamain contemplar la pictura malgrà dus brischaments desastrus (il 1799 ed il 1846) e malgrà la situaziun exposta al sulegl, al vent ed a la plievgia è d'engraziar a la lavur versada ed inschignusa da la restauratura Sylvia Fontana e ses collegas. „Pervia da la ferma dischagregaziun era la gruppa da personas protegidas sin il maletg dal mantè da protecziun sin la fatschada da la baselgia claustrala strusch pli vesavla“, rapporta Fontana davart il stadi dal maletg.

En il decurs da las lavurs han ils restauraturs decidì cun il sustegn da la Tgira da monuments chantunala e federala da restaurar il maletg da la Nossadunna cun il mantè da protecziun là, nua ch'ins vesa anc avunda detagls e da reconstruir „spazis vids“. La fatscha da l'avat e da sis ulteriurs spirituals n'han ins p.ex. betg pli pudì identifitgar. „Nossa soluziun per ils spazis vids e stada da purtretar l'avat Vigeli e sis da ses confrars per la nova pictura da las fatschas“, declera Sylvia Fontana la procedura durant la reconstrucziun dal maletg. Oz represchentan l'avat Vigeli, frater Gerhard, frater Fridolin, avat em. Daniel e frater Thierry il stadi ecclesiastic en il nov maletg dal mantè da protecziun.

Ulteriuras colliaziuns

Ina descripziun detagliada da las lavurs necessarias vi da la fatschada sid e dals clutgers è disponibla sin <http://kloster-disentis.ch/labora/kommunikation/medienmitteilungen>. Infurmaziuns davart la claustra chattais Vus qua www.ora-et-labora.ch e qua www.kloster-disentis.ch.

Contact per las medias:

Nina Hug, manadra Communicaziun e marketing, claustra benedictina Mustér,
+41 78 843 44 93, nina.hug@kloster-disentis.ch

Thomas Müller, manader Medias & Investor Relations, Banca Chantunala Grischuna,
+41 81 256 83 11, thom.mueller@gkb.ch

La Banca Chantunala Grischuna sin:

gkb.ch/medien | [Twitter](#) | [Facebook](#) | [YouTube](#) | [Flickr](#) | [Xing](#)

Banca Chantunala Grischuna – il leader en il Grischun

La Banca Chantunala Grischuna porscha tut quai ch'i' dovra per ina banca universala moderna – per personas privatas, l'economia ed il maun public. La banca occupa l'018 collavuraturas e collavuraturs (stadi dals 30-06-2016). En il chantun Grischun cun sias numerusas vals e pliras linguas, è l'interpresa represchentada cun 60 agenturas, la sedia principala sa chatta a Cuir. La Banca Chantunala Grischuna è participada a la Banca Privata Bellerive SA a Turitg ed a la Albin Kistler SA a Turitg. En il rendaquint semestral preschenta ella cun ina summa da bilantscha da CHF 23,654 milliardas in gudogn dal concern da CHF 90,4 milliuns. Il scrit da participaziun BCG è quotà a la bursa dapi ils 10 da settember 1985.

Termins

Quint annual 2016:	10 da favrer 2017
Radunanza dals participants:	8 d'avrigl 2017
